

## PN aprova proposta OJE 2022 billaun \$2 iha final global



Diskusaun no votasaun Proposta Lei OJE 2022 iha faze especialidade, iha sala plenária Parlamentu Nasionál, kuarta (15/12) Imajen TATOLI/António Gonçalves

**DILI, 16 dezembru 2021 (TATOLI)**—Parlamentu Nasionál (PN), kinta ne'e, aprova proposta lei Orsamentu Jerál Estadu (OJE) 2022 ho montante billaun \$2 iha final global.

Proposta lei número 35/V(4a) OJE 2022 aprova unamidade ho rezultadu votasaun a-favór 44, kontra 21 no abstensaun o.

“Ho nune'e proposta lei Orsamentu Jerál Estadu ba tinan 2022 aprovadu iha Parlamentu Nasionál,” Prezidente Parlamentu Nasionál, Deputadu Aniceto Longuinhos Guterres Lopes, anuncia liuhosi plenária, kinta ne'e.

Tuir Rejimentu Parlamentu Nasionál (RPN) artigu 11 kona-ba votasaun final global, Alinea 1 haktuir katak bainhira ramata votasaun iha especialidade iha plenária, halo kedas votasaun final global.

Parlamentu Nasionál finaliza debate proposta lei OJE 2022 iha especialidade no final global durante loron ualu.

Antes ne'e montante tetu OJE 2022 ne'ebé Governu submete ba PN ho montante billaun \$1,675, ne'ebé millaun \$233 ba saláriu no vensimentu, millaun \$449,98 ba bens servisu, millaun \$565,9 ba transferénsia pública, millaun \$24,4 koresponde ba kapitál menor no millaun \$401,7 ba kapitál dezvoltimentu.

Maibé liuhosi debate especialidade iha proposta adisionál mai ho proposta hamutuk 165 representante povu no hosi proposta hirak ne'e mak halo adisionál millaun \$300-resin, nune'e halo tetu OJE 2022 sa'e ba billaun \$2 tanba atu utiliza ba nesesidade povu no nasaun.

Iha planu anuál Governu nian 2022 reflète kontinuasaun servisu reforma jestaun finansa pública, ne'ebé susesivu Governu nian liuhosi roteiru orsamentasaun kada programa.

Bazea ba livru 2 planu annual OJE 2022 integra programa hamutuk 45, sub-programa 477 no total atividade 2,445.

Kuadru Planeamentu kona-ba orsamentasaun kada programa bazea ba Planu Estratéjiku Dezenvolvimentu (PED) 2011-2030 no Objetivu Dezenvolvimentu Sustentável (ODS) 2030, hanesan dokumentu estratéjiku no dokumentu polítiku.

**Jornalista : Nelson de Sousa    Editór    : Cancio Ximenes**